

उत्तरा



भिक्षु विवेकानन्द

उत्तरा

अनुवादक
भिक्षु विवेकानन्द



प्रकाशक
स्वीसिं उपासक व नानिमाया उपासिका
बलम्बु

बुद्ध सम्बत २५०५
विक्रम सम्बत २०१८

प्रथमवार १०००
मूल्य १२५

जिगु छत्वाचा खँ

२०१८ सालया वर्षावास बलम्बु, प्रणिधिपुर्ण विहार जूवल । थन हे वर्षावासया दुने उत्तरा यागु बाखँ छपु अनु-वाद सुरु याना । बाखँ ताहाक मजूसां नं बाखने श्रद्धा, भक्ति, दान, धर्म तथा मैत्री या फलादि बांलाक खनेदु ।

छन्दु सिरिमा धयाह्व वेश्यां उत्तरा यात स्याय्गु मती तथा कागु चिकनं कोलूवल उत्तरां तत्क्षणे हे मैत्री भावना यागुलिं चिकनं मपुस्ये पत्येस्वाँ हलं लः कुतु वनीथें जक जूवन ।

थ्व बाखँ धम्मपद अट्टकथा यागु खः भगवान् बुद्धं उत्तरायागु क्षमताशील यात प्रशसा याना विज्यागु नं बाखने प्रस्तुत जू ।

थौं थुगु बाखँ थुलि याकनं पाठकपिगु न्ह्योने वेफुगुया मुख्य कारण बलम्बु या हे त्वींसि उपासक व वेकः या जाहान नानिमाया यागु श्रद्धाया बलं खः ।

वेकःपिनि थुगु प्रन्थ प्रकाशयानागु पुण्यं ताक लं निस्ये आशा याना च्वनागु महापरित्राण पाठ याकनं याय् फय्मा हान हानं बुद्ध धर्म प्रति श्रद्धा तथा पालन व प्रसार याये फयेमा धयागु हे मूळ कामना खः ।

लेखकया पाखेनं वेकःपिनिगु शुभ कामना याकनं पूर्ण ज्वीमा । हानं अन्य श्रद्धालुपिनिगु पाखेनं थथेहे बुद्ध वचना-मृत प्रकाशया ग्वाहालि प्राप्त जुया पुण्य कार्यस न्हाबलें पला छपला ह्यापाळाका बोधिज्ञान लाना, सत्वपिन्त नं इना बी फय्मा ।

अस्तु ।

अनुवादक

उत्तरा

अक्रोधेन जिने कोधन्ति, थुगु धर्म देशना शास्ता वेलु
वने विहारयाना बिज्यागु बखते, उत्तरायागु छेँ भोजन कार्य
धुंका उत्तरायात आझा जुया बिज्यागु जुल ।

राजगिरी नगरे सुमन धयाह्न साहुयाथाय् पूर्ण धयाह्न
गरीवह्न मनू छह्न च्यः च्वना जीवन हना च्वन । वया छेँ
वया परिवार कला व उत्तरा धयाह्न म्हाय् छह्न जक दु ।

छन्दुया दिने राजगिरी न्हेन्दु तक नक्खत किलन धयागु
(गुणपुह्निथेँ जागु) नखः माने याय्गु नाय्खि च्वेकल । व
खँ न्यना सुमन साहुनं सुथे थःथाय् वःह्न पूर्णयात न्ह्योन्य
सःता धाल । पूर्ण ! थौं म्हीथाय्पापिं सर्कासयां नखः माने
या वनिगु जुया च्वन । छं ह्यु विचार वः छं नं नखः माने
याय्गुलाकि ज्याया वनेगु ?

पूर्ण- साहु ! नखः धयागु धनीवर्ग तयेगु निम्ति जक
खः । जिथिंजाह्न गरीब यात नखः धयागु गन, गुम्हेसिगु छेँ
क्वाति त्वनेत न ह्युचुं दु, न जाकि छगः दु, उम्हेसित नखः
बयां ह्युयाय्गु । याद द्रहँ दत धासा बुँ वने ।

साहुँ— पूर्ण ! अथेसा छ सा ज्वना बुँ हँसा धका द्रहँत
बिळ । पूर्ण वःबःलापिं द्रहँ निह्न ख्याना हल जुवा पाछाया
कलाम्हेसित धाल, भद्रे ! थौं सकलें नखः माने या वनी ।
म्हीपिं गरीब म्हीगु निम्ति नखः वःसां छं खेले मडु । उकिं जि

बुँ वनेत्यना छंत नं जित नं जाथुया याकन जा ज्वना बुँवा
धका धया पूर्ण बुँ वन ।

थुखे सारिपुत्र भन्ते न्हेन्दु तक निगोध समापती च्वना
उखुनु समाधि दना थौ सुयात संप्रह (उद्धार) याय्गु ज्वी
धका विचायाना स्वःग् बखते थःग् ज्ञानयादुने पूर्ण खनेदत ।
अले ध्व मनू श्रद्धादुह्य व संप्रह याय् फइह्य खःला मखु धका
नं स्वया बिज्यात । संप्रह थाय् फइगु श्रद्धा व हानं संप्रह
यानार्थे महान सम्पत्ति नं लाभ ज्वीगु दु धकानं सियका
पात्र चीबर धारणयान गन पूर्ण साबाका च्वंगुखः अन वना
बुँ सिथे छथाय् च्वना बिज्यात ।

पूर्ण स्थबिरयात खनेवं सावाय्गु दिना वया स्थबिरयात
पञ्चाङ्गपूर्ण ज्वीक दण्डवतयाना दतिवन मालज्वी धका सियका
दतिवन हया बिळ । स्थबिरं लःया निमित्त पात्र ब लःचालनि
बिल । पूर्ण पात्र कया लः चालेयाना लः हया बिल । स्थबिरं
लः कया ख्वाः सिला मती तल । ध्वया छेँ दकले के ज्वी ।
छेँ वनेवं ध्वया जाहानं जितखनि मखु । उकिं गबले तक
उह्य उपासिका भोजन ज्वना छेँ प्याहाँ वइगु ईः ज्वी मखु,
अबले तक जि थन हेनि च्वना च्वने धका अनसंतुं च्वना
बिज्यात । अन छं समय पी धंका आःला छेँ प्याहाँबल धका
सीका नगर पाखे स्वया भिन्ना बिज्यात ।

उखे पूर्णया जाहान बुँ वनेत वःह्यसिनं स्थबिर भिन्ना
बिज्याना च्वंगु छेँ नापलात, अले मती तल । गबले जिके दान
बीगु वस्तु दइगु खः अबले स्थबिर नाप मला । हानं गबले
स्थबिर नापलाइगु खः अबले दान बीगु वस्तु मदयाच्वनिगु ।

थौ दान बीगु वस्तु नं दु स्थविरनं भिच्चा बिज्याना च्वंगु
नापलना च्वन । यदि स्थविरं जितः दया तथा संग्रह याना
बिज्यात धासा तसकं उपकार ज्वी धका जासि बै दिका
स्थविरयात पञ्चाङ्गपूर्णं ज्वीक दण्डवत याना धाल-, भन्ते !
सागु व मसागु या विचार मतस्ये छह्य दुःखिया उपरे कृपा
तया थुगु भोजन स्वीकार याना बिज्याहुँ ।

स्थविरं पात्र फल उह्य उपासिकां छपाह्लातं जासि ज्वना
छपाह्लातं स्थविरयागु पात्रे भोजन तथा बिल । स्थविरं गाथे
च्वन्यवं ह्लातं पात्र तिना बिज्यात । अले उह्य उपासिकां भन्ते!
ध्व भोजन निगु भागयाय मखु । छलपोलया दास यात थुगु-
लोक यागु संग्रह मयास्ये परलोक यागु संग्रह याना बिज्याहुँ ।
ध्व फुकं बीगु इच्छा दु धका धया भोजन फुकं तथा विया
भन्ते ! छलपालं खंका बिज्यागु धर्म जिमिस न खंके फयेमा
धका प्राथनायात । स्थविर एवं होतुति(=अथेहे ज्वीमा धका
दनात् अनुमोदन यानालि, गन लः दु, अन वना भोजन या
बिज्यात ।

उपासिका छेँ ल्याहाँबना हानं जाक माला जाथुया जा
ज्वना वल, पूर्ण बागु करिसति(बापी) बुँ वायुके धंक्कुगु बखतेहे
तसक नयेपित्याका द्वँ हँत फयना सिमा कयू वया जा हइगु
प्रतीक्षा याना च्वन । थुवे कलाह्य जा ज्वना वंगु बखते भातह्य
च्वना च्वंगु खना अवश्यन नयेपित्याका जित स्वया च्वंगु
ज्वी । जि वयागु नं तसकं लिबातला छुथेँ लिबाक वल धका
तमं बीबिया कथिहेनं दायफु धका ग्याना तापाकनिस्स्ये स्वामि!
थौ छकः छिसँनं मन प्रसन्नयाना दिसँ जि यानागु न्यायातः

निरर्थक ज्वीक स्यंका दी मते । थौं जिं इलेहे जा बुका ज्वना
 वयागु खःसां लेँ बिचे धर्मसेनापति भित्ता बिज्याना च्वंगु
 नापलात । अले ज्वना वयागु जाफुकं वसपोलयात दान बिया
 हानं ल्याहाँ बना मेगु जा थुया च्वने मागुलि धिला जुल ।
 थुकी तँचाया दीमते, मन प्रसनंयाना दिसँ धका धाधां वना
 च्वन ।

पूर्ण मथूपहलँ अय् छं छु धया हाला वया च्वनागु ?
 धका न्यन ।

कलाम्हं ध्वीक खँ फुकं कन । पूर्ण कलाम्हेसिग खँ
 न्यना, भद्रे ! छं भिगु हे ज्यायात छंगु ज्याखन, जिगु मने
 तसकं हे सन्तोष वल, थौं सुथे जिंन वसपोलयात दतिवन व
 ख्वासिलेगु लः बिया सेवायाना धका निहतिपू या परस्पर
 खँ हाना मन प्रसन्न याना कलाम्हेसिनंयागु पुण्यकार्ययात
 अनुमोदन यात । लिबाक जा नःगुलि जां कार्थे च्वना शरीर
 न्यला कलाम्हेसिगु मूलेंतुं छ्योँ दिका पूर्ण न्ह्योँ वेकल ।

थुखे सुथे सावाका तक बुँया धू समेतं फुकं लुँ जुया
 च्वन । वं न्ह्योलं चाय्वं व्बीं स्वःबले बुँ फुकं ह्यासुसे च्वना
 च्वंगु खना कलाम्हेसित धाल । भद्रे ! व्बीं छक स्वः बाय्का
 तक फुकं लुँथेच्वं थौं जा नयागु लिबागु लिं मिंखा जकं बुलुल
 ला छु ?

स्वामि ! जिंन अथेहे खना ।

पूर्ण दनावना स्वः वंबले व फुकं लुँ हे खः धका सिल ।
 अले धाल- अहो ! भाग्य आर्य धर्मसेनापतियात दान
 बियागु पुण्यया फल थौंहे जित प्राप्त जुल धका खुसिजुया

ध्व धुलिमद्धि सम्पति न सुषुका तयेफइ, न नया हे फुकं
फुइग ख धका वहे जा तथा हःगु थलेत्तं जाय्क लुँ तथा
राजदरवारे द्वाहाँ वनेगु प्रमाङ्गीपत्र कया जुजुयाथाय् वना
लुँ न्ह्योन्य तथा जुजुयात नमस्कार याना छखे दना च्वन ।

जुजुं- अ ! छं छु हयागु ?

पूर्ण- महाराज ! थौं जि पालागु जुक बुँ लुँ जुया च्वन ।
उकिं ध्व लुँ हया च्वना, बाकि लुँ हयेमाला च्वंगु दु ।

छ सु ?

जि पूर्ण खः ।

छं थौं छु याना ?

महाराज ! जि थौं सुथे धर्मसेनापति यात दतित्वन व
ख्वासिलेगु लः बिया । जिह्य जाहानं जितः धका हःगु भोजन
वस्पोलयात दान व्यूगु जुल ।

जजुं अहो ! आश्चर्य, धर्मसेनापति यात व्यूगु दानय
कल थौं हे बिल धका धया ! पूर्ण ! आः छन्त छु माल-धका
न्यन ।

महाराज ! द्वलंद्रः गाढायंका लुँ ल्हेके माल ।

जुजुं गाढा बिल राजपुरुषपिसं गाढा ज्वना वना जजु
यागु सम्पति ध्व धाधां गाढायतल । जुजुयागु नांकया गाढाय्
तःलिस्ये का का थाय् चायाचा नतुं जुयावन । राजपुरुषपि
वना व खबर जुजुयात कंवन ।

जुजुं-तात ! छिमिसं छु धया तथा ?

महाराज ! छिगु ध्व सम्पति धाधां तथा ।

मस्त ! व जिगु सम्पति मस्तु । व पूर्णयागु सम्पति खः ।

हुँ वना पूर्णयागु भाग्ये प्राप्त जूगु धका ति धका धया छवत ।
इपि वना अथेहे धाघां तल । अले का का थाय् लुँनतुं
जुल । व लुँ फुकं हया राजपतांगिरी द्वं चिना बिल । व द्व
चय्कु जा जू ।

जुजुं नगरे च्वंपिं जनता मुंका थ्व नगरे थुलि सम्पति
सुयां दुला ? धका न्यन—

मदु महाराज ! धका उत्तर बिल ।

अथेसा आ थ्वयात छुयाय् माल ?

महाराज ! पूर्ण यात साहु पदवी बीमा ।

जुजुं 'बहु धन धयाइ साहु जुल' धका साहुया पदवी
बिया तुयूगु छत्रं कीकल ।

पूर्ण- महाराज ! जि थौतक कतपिंगु छें च्वना च्वना ।
छें धयागु मदुनि उकि जित च्वनेगु थाय् छगू फ्वने ।

जुजुं वयात थाय् छगू बिल । वं उगु हे थासे याकनं
छें दयेका गृह प्रवेश (-छें द्वाहाँवनेगु) मङ्गल व छत्रमङ्गल
निगू उत्सव छकलयाना न्हेन्दुतक बुद्ध प्रमुखं भिक्षुसङ्घपित
महादान बिल । शास्तां दानानुमोदनयाना अनुपूर्वि कथा उप-
देशयाना बिज्यात । उगु धर्मदेशनाया अन्ते पूर्ण व पूर्णया
जाहान अले उत्तरा स्वम्हं श्रोतापति जुल ।

छन्दु सुमन साहुँ थःह काय्यात उत्तरा फ्वके हल । पूर्ण
बीमखु धया छवत ।

सुमन साहुँ पूर्ण ! आमथे धाय्मते छ जिगुहे आश्रय
कया थौं तःमि जुल । छं उत्तरा छह बीगुली थाकु चाय्मते
धका हानं धाय्के हल ।

इपि धासा मिध्यादृष्टि, उत्तरा त्रिरत्न शरण वने मदु-
थाय् च्वने हे फइ मसु । अले अन्थाय् बिया छ्वयां छुयायगु
धका पूर्ण म्हाय् बीगु इच्छा मया ।

ध्व खँ मीका मेमेपिं साहुपिन वया पूर्णयात पुर्ण ! उह
साहुनापं सम्हन्ध तोथुले मते उत्तरा छम्हव्यु धका धावल ।

पूर्ण इपिं साहुपिंगु खँ न्यना उत्तरायात अषाड पुहीखुनु
बिया छवत । उत्तरा भातपिंथाय् वंस्ये'निस्ये' भिक्षुपिंथाय्
नं वने मखं भिक्षुनीपिन्थायनं वनेमखं हानं दान पुण्ययाना
उपदेशनं न्यनेमखं वर्षावास निलात्या वने धुं'कल वं पुण्य
कायया नामं छुं छताहे नं याय् मखंनी । अले छन्दु थः
पासापिं सःता न्यन-पासापिं ! वर्षावास या समय गुलदनी ?

आय् ! बाच्छि जक दनि धका पासापिसँ उत्तर बिल ।
अले उत्तरां अबुम्हेसित चिट्ठी च्वल । अबु जित थन्यागु जेले
छाय् ते हयागु, थुजोगु मिध्यादृष्टि कुले च्वनेगु स्वयाला
मेपिनि भ्वातिं ज्यायाना नयेगुहे तसकं भिं'वी खना । वस्ये'
निस्ये' भिक्षुपिनि खा छकः धका स्वेदुगु मसु । छुं छता
धका दान पुण्य याय् दुगु मसु' धका जुया च्वंगु दुःख प्रकट
याना छवत ।

म्हाय्म्हेसिगु दुःखयागु खँ न्यना अबुम्हेसिया मनेनं
तसकं दुःख जुल । अले भिन्याद्वः दां प्वःचिना 'उत्तरा आम
नगरे हि द्वःछि दां काइम्ह सिरिमा धयाम्ह वेश्या छम्ह दु ।
ध्व दां वयात बिया वं थःम्ह भातयागु सेवाय् तथा छं पुण्य
कार्य या धका पौ च्वया दां बिया छवत ।

उत्तरा सिरिमायाथाय वना पासा ! ध्व दां कया छिसँ

जिम्ह भातयागु बाच्छि तक सेवा याना दिसँ धका दां
बिया सिरिमा व्वना उत्तरा भातयाथाय् वल ।

भातम्हं न्यन आम सु ?

स्वामि ! थ्व जिम्ह पासा खः । बाच्छितक थ्वं छिगु
सेवा याइ । जि बाच्छितक दान पुण्य याना धमं उपदेश
न्यनेगुली च्वने ।

सिरिमायागु खाःखंबले भातम्ह खुसिजुया ज्यू धका
स्वीकार यात ।

उत्तरां बुद्ध प्रमुखं भिक्षु सङ्घपित निमन्त्रणायाणा प्राथना
यात । भन्ते ! थ्व बाच्छि तक छल्पोलं सुयगुनं भोजन
स्वीकार याना बिज्याब् मते, भिक्षुसंघ पिन्तनं भोजन दान
याय् ।

भगवान् बुद्धं स्वीकारयाना बिज्यास्ये लि आ थनि निसै
बाच्छितक दान पुण्ययाना धमं उपदेश न्यने दइगु जुल धका
उत्तरा तसकंहे लेताया का थुकथं यागु दायकी का थुकथं मरि
छु का थुकथं थुगु दयेकि का थुकथं उगु दयेकि धका सकसितं
ज्या वाना थःमं नं फुथाय्तक ज्या याना दान भोजन ठीक
याना दान बिल ।

छन्हु भातम्हेसिया मने वन पवारण पुही कन्हे खः ।
थ्वया दान कार्यनं कन्हे सिधइगु जुल । थ्वः मूर्खम्ह मिसां
छु छु याना सनां ज्वीगु ज्वी धका भयाले व्वना स्वयाच्वन ।

उत्तरा खाचकंका ले ले तातां थौनं उगुयाथुगुया धका
ख्वे थुखे ज्या वाना दान कार्ययागु निमित्तं सना जुल । भुतू-
यागु ज्यागूनं सं जूगुलिं छ्यो छगतं भवीक नौ च्वन, ख्वाले

न्हासेनं हाकः किनाचवन, मयाले च्वना स्वया च्वंम्ह
भातम्हं उत्तरायागु ख्वाले न्हासे हाकः किक सनाजूगु खना
मनं मनं गपायच्वतं मूखंम्ह मिसा ज्वी ध्व, सुमुक ताथे
धुक-मुक धायक च्वना महासम्पत्ति यागु सुख अनुभव
याना च्वंसा गाम्ह मनू स्वः स्वः भ्रमण तयेगु निम्ति भ्वातिथें
सना दुःखसिया च्वंगु धका ह्लि।

व न्ह्यगु वया लिक दना च्वंम्ह सिरिमां खन। अत्ते
च्वया मनेनं ध्व मिजं छाय, न्ह्यगु ज्वी धका भयतं कोस्वः
खले उत्तरा खन। ये! ध्वला उत्तरा खना न्ह्यगु खनिसा।
ध्वया वहे मिसा याके आपा प्रेम दु खनां व थः बाच्छि यागु
निम्ति जक वया च्वंम्ह जूसां नं अन दुगु ऐश्वर्य यागु सुख
अनुभव याना थः पिने ज्यामि सरह वया च्वनागु धका
लोमंका जि ध्व छें या मालीकनी खः धका मती तथा उत्तरा
यात स्यायगु निम्ति तलं दुरुहं काहाँ वया भोजनसालाय
वना कागु ध्यो धवटं छतु तुया उत्तरायात लूग्ल। उत्तरां व
वःगु खनेत्रं ध्व जिम्ह पास खः। ध्वयागु हे मदतं याना
जि थौं दान पुण्य याना धर्म कथा न्यने दत धुम्हसयागु
गुण तयेगु थाय, माला स्वत धासा चक्रवाल हे चाकू ज्वी।
ब्रम्हलोक हे न चिधं ज्वी। उकिं जिं ध्वयागु उपरे क्रोध
याय, मज्यू। यदि जिके ध्वयागु उपरे क्रोध दत धासा ध्वं
लूगु ध्योल जितः प्वीमा। यदि जिके ध्वयागु उपरे क्रोध
मदुगु खःसा थुकिं मप्वीमा धका मैत्र चित्त याना च्वन।
सिरिमां कागु ध्योलं लुना त्रि। तर उत्तरा यात छतिं हे
सपू केवल सिचुसे जक च्वन।

सिरिमा या मने ध्व तच्चतं मक्का ज्वीका धका धवः
 ज्वना मेगु त्वीत वन, ध्व खँ उत्तराया दासिपिसं खना, अरे !
 दुष्टनी ! आम छं ह्युयाय् त्यनागु ? जिमि मालीकनी नं छन्त
 ह्यु यागु दु अरे !! छं आम कागु चिकनं ल्वीत धका धा धा
 फुक मुना सिरिमा यागु ह्या ज्वंम्हेसिनं ह्या ज्वन जँ ज्वंम्हे-
 सिनं जँ ज्वन, सँ ज्वंम्हेसिनं सँ ज्वना कोथला सास्ति
 यात ।

व कसा याना च्वंगु उत्तरां खना अरे ! अरे !! छिमिसं
 जिह्म पासा यात ह्युयानागु । ह्याय् आमथे सास्ति यानागु
 याय् मते बी, धका पं बलं हे पने मफयूक कसा याना च्वन ।
 बल्ल-तल्लं फुक दासीपिन्त छये चीका वना सिरिमा यात
 थना पासा ! छं ह्याय् थथे यानागु छन्त ह्यु जुल धका धया
 कागु लखं मोल्हीका सुगन्ध चिकनं व्वीका विचा यात ।

सिरिमा- उत्तरां यागु क्षमा शीलता खना जिं मखुगु हे
 ज्या यानागु जुल । वया भात हिलेवं हे जिके गज्यागु कुमती
 स्वचा वःगु । गथे कागु चिकनं ल्वीगु अँत वःगु धका थःगु
 वैमनष्य भाव यात खंका थःत थमं धिक्कार याना, उत्तरा
 यागु क्षमाशीलता लुमंका, वया मनूत वया जितः कसा याबले
 जिगु जक हे गुण लुमंका इमित हते याना छवत । थुगु
 प्रकारयाह्य शुद्ध चित्तह्य उत्तरायाके जि क्षमा मफवन धासा
 जिगु छयो तज्याना न्हेकू दलावनी धका ग्याना उत्तरा यागु
 पालि भोसुना आर्य ! जिगु अपराध यात माफ याना दिसँ
 धका क्षमा फवना च्वन ।

उत्तरां- सिरिमा ! जिह्म अबुयाके क्षमा फवँ अबुं क्षमा

बिल धासा जि नं क्षमा बी ।

सिरिमा- आर्य ! छिकपिनि अबु पूर्ण खः वेकः यागु
पाखे क्षमा बीके छिसँ क्षमा व्यु ।

उत्तरां- सिरिमा ! पूर्ण जिह्व बट्टजनक (=संसारिक)
अबु खः । मेह्व विवट्टजनक (=लोकुत्तर) अबु दनि उह्व अबं
क्षमा बिल धासा जि नं क्षमा बी ।

आर्य ! छिकपिनि विवट्टजनक अबु धयाह्वसु ?

सम्यक सम्बुद्ध ।

जि वस्पोलयात ह्वमस्यू ।

सिरिमा ! जि छित ह्वसीका बी । वस्पोल कन्हे भिक्षु
सङ्घपि मंका भोजन यायूत थन जि थायू छें हे बिज्याइगु दु ।
छिसँ श्रद्धा दुथें सत्कार यायगु वस्तु ज्वना थन भासँ ।

सिरिमां ज्यू हवस आर्य ! धका दना छें वना थः न्यासः
पासापिं व्वना नाना प्रकार यागु स्वाद्य भोज्य पदार्थ ज्वना
सतिसुनु उत्तरा यागु छें वल । तर थमं ज्वना वयागु दान
वस्तु बी मछ्छाळा च्वन । अले उत्तरां उग दान वस्तु कथा
तथागत प्रमुखं सकल भिक्षु सङ्घपिनिगु पात्रे तया बिल । तथा-
गत व भिक्षु सङ्घपिनि भोजन कार्य धुं कुस्येंलि सिरिमां पासापिं
फुक व्वना तथागतयागु चरणे भोसुना क्षमा पवना च्वन ।

शास्तां न्यना बिज्यात, सिरिमा ! छं छु अपराधयाना च्वना ?

भन्ते ! जिं ह्विगः उत्तरायात स्यायगु निम्ति कागु
न्योलं लुना, व खना उत्तरा या दासिपिसं जितः कसा यावळ ।
उत्तरां अे ! छिमिसं जिह्व पासा यात छाया सास्ति यानागु

धका फुकसितं लिचीका जिगु जक गुण लुमंका जितः प्रशंसा
याना च्वन । उत्तरायागु क्षमाशीलता खना जिगु भने वन-
थुजोहसित अपराध यानागुली क्षमा मफ्वन धासा जिगु छु
गति ज्वी धका जि उत्तरायाके क्षमा फवना । उत्तरां जितः
धाल-, छल्पोलं क्षमा बिल धासा जिगु पाखे न क्षमा ज्वी ।
उकि थौं छल्पोलयाके क्षमा फवना च्वना

भगवान्- उत्तरा ! छं अथे धयागु खः ला ?

उत्तरा- खः भन्ते !

भगवान्- उत्तरा ! अबले छं छु मती तया च्वना ?

उत्तरां- भन्ते ! जिं थुह पासायागु गुण तयेयायू माला
यंकल धासा चक्रवाल न चीकू ज्वी । ब्रह्मलोक न चीधं ज्वी ।
थुह पासां मदतयाना न्यूगुलिहे थौं थुगु प्रकारयागु पुण्य
साधन यायूगु दुगु खः धका मती तया च्वना । हान धया
थुह पासायागु प्रति जिके द्वेष भाव दत धासा थ्वं लूगु
चिकनं जितः प्वीमा यदि द्वेष मदुगु खःसा मप्वीमा ।

शास्तां साधु ! साधु !! उत्तरा छं भिंगु मती तल । थुगु
प्रकारं हे मभिंगु जुक्क यात भिंगु भाव दयेका त्याके फयेकेमा
धका थुगु गाथा आज्ञा जुया विज्यात ।

अक्रोधेन जिने क्रोधं असाधुं साधुना जिने

जिने कदरिष दानेन सच्चेन अलिकवादिनन्ति

अक्रोधं क्रोधयात त्याकेमाः मभिंगु याम्हेसित भिंगु याना
त्याकेमाः कपटीह यात दान बिया त्याकेमा भुठवादी यात
सत्यवादी जुया त्याकेमाः ।

(१३)

तथागत यागु थुगु धर्म देशना न्यना सिरिमा सहित
वच्चा न्यास पासापिं नं श्रोतापति फल लापिं जुळ, धर्म देशना
सकलयात सार्थक जुळ ।



प्रार्थना

त्रिरत्न याके शरण वना म्मी, निर्वाण पदवी लाय्मा याकनं।धुवा॥

दानया पुण्यं लोभ मदेमा, शीलया पुण्यं द्वेष मदेमा ।
भावना या जोरं मोह मदेमा, दानशील भावना वृद्धियाय्फ्य्मा

ध्व संसार धैगु दुःखयागु खानी, दुःख फुकेयात ज्वी माल ज्ञानी।
संसार चक्रं छुटे जुया वनेत, चतुरार्य्य.सत्य खंका च्वने फयेमा


मिध्यादृष्टिपिंगु सङ्गत मज्जीमा, सम्यकदृष्टिकुले जक जन्मज्वीमा
न्याथाय्जन्म काय्मा न्यागु जुनी ज्वीमा, बुद्धया धर्मे दृढचित्त
ज्वीमा ॥

Dhamma.Digital

अन्ध विश्वासे गुबलें मळाय्मा, शुद्धगु मार्गे ज्वाय् वनेफ्य्मा ।
न्याथाय् जन्म जूसां धर्म पासा फुकं, मिलेचले ज्वीमा वाया
च्वने म्वालेमा ॥

अत्याचारवृद्धि जुयावैगु बखते पापिपिंगु पुचले जन्मज्वी म्वालेमा
थुह्महे बुद्धया शासन दुवले, शुद्धगु माग व फल लाय् फ्य्मा॥

मफुसा मैत्रेय बुद्ध जुयेवं मनुष्य धाय्का जन्म काय् दय्मा ।
बस्पोळ यागु धर्म ज्वना म्मी, उगहे जन्मे निर्वाण लाय्मा ॥



मुद्रकः- मञ्जुश्री प्रेस, ललितपुर, इखाङ्ग, आनन्दबहाल, नेपाळ ।